

道光十六年續修

鄒平縣志

官庫藏板

鄒平縣志原序一

濟南之鄒平在古爲鄒侯國漢稱今名有伏生勝傳
尙書秦火之餘名傳後世而宋范文正公仲淹嘗讀
書縣之黌堂嶺書堂在焉邑多文人予按鄒至謁伏
生祠墓與諸生講學望長白山雲氣來接賦詩樂之
徵縣志文字多磨滅不辨縣令徐君聖齊彬彬文學
君子也以扶墜補闕爲已任請從事修輯是時比部
張舉之請告家居藏書多善本博采勤蒐進士馬宛
斯討核詳實而吳門顧寧人自上谷來悉授以校之
書遂成三君之言曰志者一邑之掌故貴事核而言

簡核取其微簡取其嚴非若世之文集家乘遊山記
可矜奇而務博納交而貢諛也君子以爲然故徵文
考於網羅遠近放失而向所附會及詞不雅馴者皆
辨正芟去其載在編者皆可信而可觀也六郡惟濟
南登州二志燬余旣從史成登州志而濟南缺焉以
爲憾苟得賢有司及士大夫踵而成之是可以爲法
焉舊志四卷刻於嘉靖十二年今更定之凡八卷順
治己亥督學使者宣城施閏章叙

鄒平縣志原序二

覽馬宛斯先生繹史卷一百六十而知鄒平邑志當
成於其手宛斯邑之名家也其時又以學使施尙白
爲之序乃蒐嘉靖十二年舊本凡四卷更爲八卷噫
亦云善矣今纔週甲子其間政治得失丁戶繁簡風
俗醇疵科目斷續文藝刪存已大有不同若姑以云
待卽再閱六十年而故老無人遺文散失後之視今
亦猶守嘉靖舊本云爾是司土者之責吾鄉程君霽
江保障茲邑不減太邱毅然已任以爲鄒平建置遠
不具論自前明以及我代爲濟南屬土田平衍得沙

河白條溝泉流之沃潤民稱不貧又有長白黃山諸
峯紆紆磅礴人生其地亦頗不佻士敦實行尙氣誼
官中朝者皆嶽嶽懷方多所建白余按學青州兩過
於此北望鬱葱烟樹迷離曰是漢伏生當祖龍焚書
之後年九十餘以腹記口授尙書故墟也過黌堂嶺
下冉冉雲光拂我衣帶曰是宋范文正公下帷處也
且諫輒焚草者若而人清可飲冰者若而人志堅泉
石節矢柏舟者若而人豈非土厚風淳物產靈異與
前賢焜耀輝映者乎莫爲之前雖美弗彰莫爲之後
雖盛弗傳霽江盡懼墮前美而輟其後也於是補輯

精嚴而稍稍益其志於八卷之外請序於予予嘉其
克紹前令徐君聖齊又徵邑紳士咸劉諸公復校於
馬子瑜諸人瑜則宛斯先生令嗣也可謂踵事增華
於今爲烈已惟予文采殊遠遜尙白而勉爲掇其句
於端康熙丙子督學使者山陽劉謙吉撰

鄒平縣志原序三

國有史邑有志古已志也者非以倭陳景物實以宏
獎人倫誇多闡靡無取也予治嶧山左眺二東之山
水披六郡之成書星分女虛地控海嶽洋洋大國炳
載藝林我

朝自一統志告成輿圖版籍一覽大觀而濟南屬邑之
鄒平志始修於徐君今恐君重修之補闕拾遺遠蒐
近采條理井然足婉信史予嘗東望長白醴泉舊剎
掩映於烟雲飄忽中其文正公讀書舊蹟乎且弔荒
祠瞻墓木伏生至今存可也鄒邑古文獻地得以傳

之不朽者程君之力居多雖然誌者志也心之所之
謂之志一道德以同風俗所以定民之志而不在方
輿紀事紀言紀人之末也是不能不厚望於宰茲土
者是爲序康熙丙子山東塩法道銀城李興祖題

鄒平縣志原序四

古先王肇置封建列爵分土凡載版圖悉歸聲教故
邾莒屬居屏藩滕薛亦備附庸自漢唐分裂郡縣而
星羅碁布雖黑子彈丸輶軒所至並足備太史之採
風所以國有史邑有乘其關係均至重也鄒平爲古
鄒侯國其間星野川嶽方域城池戶口賦役官師人
物以及風土文章忠孝節義傳聞之散軼時事之災
祥莫不賴有淹雅鴻博之士出而詳其記載宏其纂
集以備掌故垂爲一代之書然斯於司牧者實與有
責焉余於戊辰春奉

命承乏茲土甫下車巡視城垣因陟麗譙眺山川之形
勝觀人民之繁萃卽以疆域井里溝洫畎畝之大畧
詢之吏人而吏人蒙然張口如墮雲霧余爰取舊志
披覽見其支離附會疑信相參齟齬各半蓋此志乃
前令徐君修於己亥歲迄今閱四十年所矣其中官
職有代替人物有興謝時會遞變因革不侔不獨田
隴移畛屋樹易主卽清河潞潞滴蕩遷徙均失其故
道刻舟膠柱聳見互舛余於是深爲慨惜欲重加訂
証以資考徵緣簿書鞅掌猝猝無暇曷致曠此志者
八載比歲黍稷時登雀鼠日簡廼請邑之紳士有聞

望者相與參訂而校讐之去疑以存信芟繁以就簡
復掇馬宛斯先生舊志遺稿用宏潤色適其令嗣子
握手示一冊爲志補遺時余小阮復至自邗江是亦
能夙擅著作之林者刻意丹青益相考核爰編輯以
類序之分爲八卷於是文獻燦然稱大備焉是集也
二三子修飾討論而余特纂定以集其成非敢自負
爲董狐之筆也然輶軒問俗太史採風持斯編以往
亦不能無小補云康熙乙亥知鄒平縣事天都程素
期撰

[illegible]

鄒平縣志原序五

鄒平李大令西圃以志藁相質自稱采訪者十有四
年付邑拔貢成啟洸舉人成瓘攷纂拔貢王方珊舉
人王方瑚進士李景嵩輩校勘成書案志圖與古不
合者以今目驗得之說與衆殊者以徧徵古書得之
爲之注爲攷八表五志四首以總紀提其綱以古名
舉大畧證長白山有肅然名以濟潔見經典沿討上
游謂潔已輟流其小清爲古濟瀆大清則潔渠今受
濟水者語爲閼通宋人謂濟瀆湮者不知河流徙移
其水自在潔亦此例也鄒平故地大割附它邑漢鄒

平之澤今涸地入齊東今求得漢故縣在孫家鎮又
於魏王城求得赫胥氏陵證爲東朝陽城確在齊東
舊屬鄒平尤爲誠篤好古之徵不粉飾故蹟

天子表章師儒允臣工請立伏氏博士邑人士彌識
所矜嚮其山川之槃鬱風俗之忠厚田土賦役兵防
驛遞之成灋與夫先正政蹟鄉先生懿行流風及匹
夫匹婦之志節可傳者誠宜蒐輯論定視已成事有
所興起語云君子愛人小人易使不於斯志重有賴
歟辛酉秋余奉

命典試大令與分校信其不愧儒吏比視學車過鄒

平相見益親人樂道其賢今修志成所屬能知人於
舊志從馬宛斯之意能定取舍所補僅百年事而於
古多訂正又非官重眎其民民安其政固無暇及其
是可爲伏生鄉人喜者也嘉慶八年歲在癸亥夏六
月

文淵閣直閣事內閣學士兼禮部侍郎提督山東學
政西江劉鳳誥譔